

SCHNITZEL FÜRS BFO 2018 (Melodie vom Singvogel klaut..)

Mr nämme aa, de wötsch vo Aesch uff Muttenz faare,
denn nimmsch doch sicher s Drämmli, nit dr eige Kaare
und landsch denn überraschend irgendwann z Birsfælde —
kaschs als „Erlebnisreisen BVB „ vermälde!

Dr Petrus het mit Basel zimmlig vyl am Huet,
au an dr Fasnacht macht är s Wetter meischtens guet.
Und mänggmol schiggt är Näbel do an Rhy—juhee!
denn gsesch dä Roche-Durm nümme und d Skyline sich okay!

Dä Bus gits nit...nainai, das Dramm faart nit dört duure;
wötsch neume pünggtlig sy, gheysch mit däm Blan uff d Schnuure.
Im Display schtöht , vermutlig syg Verkehr dr Grund...
und sicher weiss me nur, dass nie meh öbbis kunnt!

Es dröhnt und däscht,vibriert und tschätteret, s sich e Schand,
s bekannte Tiefbauamt sorgt nit für Rueh im Land.
Dr Wessels grinst- ihm isch das glych -es koscht jo Gäld-
är schiggt jetz neu Super-City-Cats ins Fäld!

Dr Donald Trump isch hochbegabt in krumme Sache,
wo -n-är z Amerika und in dr Wält duet mache.
är soll nach Basel ko, do wurd ich ihn no gseh—
dä hätt wie nüt e Boschte bi dr BVB!

Me weiss nit gnau, was so Designer dien studiere,
wenn si fürs Oevau sollte Sitzblätz konzipiere-
bruuchsch öbbis zum Verheize- s sich dr kalt und klamm-
denn hol doch sone Bänggli us em Achter-Dramm!

Was eim z Venedig und au do in Basel graut:
bim einte bröggelets ,und s andre wird verbaut-
und wenn denn beidi untergöhn, was uns jo schtört,
denn hänn si mindeschtens zum Wältkulturerb ghört!

Dr Primo duet mit synere Fädere wei- und weihe,
das BFO bringts mänggmol eifach nit uff d Reihe..
Im Himmel obe lacht dr Dani zimmlig breit:
Los,Primo, gräm di nit—i has scho immer gseit!